

Ma scotè cousta ch' l'è drola,
 L'ha vojula fè strenè.
 L'ha tirà una parpajola
 Bela, e feita con doi dnè.
 O che nosse strepitose!
 S'è mai vist un autrstan;
 Basta di, ch' l'è andait a spose
 Fina coul ch' a fa balè i can.
 E pr fè pi bela giola,
 Furni 'l past, s'è dait un bal,
 J'era un sonador d' subiola
 Ansetà ansima al trabial.
 Senza tute st' alegrie,
 Che sarnada j' an fait fè!
 J'era doe cirimie,
 Des ciochin da mulatè.
 Maraman Giamper Bragari
 Con so cheur s'è andà arposè,
 Son virasse 'l tafanari,
 L' an fait nen ch' petesè.
 Coul ch' l'ha fait sta mariura,
 S'è vagnasse un bel capel,
 Già d' un pes na tnio da cura
 Atacà sot al fornèl.

Delle signore Magne.

CANZONE VII.

Signore Magne,
 S' i beive del vin dos
 Con dle castagne
 J' avroma 'l temp ventos,
 S' i giunse d' fasolat,
 Che tron e che gran sciat
 An mes a le montagne

A s' veulo fè senti,
Signore Magne!

S' i bute ancora
D' ciser e ciserche pr dsora
Con d' fave fricassà,
Ohimi! che brut armor
Veul fè vostr as da fior!
Ciapè un pò le filagne
A stranuè pr là,
Signore Magne.

Piè d' siole an mnestra,
S' veule carighè bin la balestra,
Con d' uva sla rosà,
S' ai intra d' ris al lait,
L'è giusta vostr fait
D' andè pr le caussagne
Fasand i veust consert,
Signore Magne.

St' argiovisansa
V' andrà costè d' camise an abundansa,
Prchè ch' a peul pa d' manch,
Ch' a forsa d' petarei
Na fasse dij bindei
Da empine dle cavagne
Pr vende ai strassamiù,
Signore Magne.

J' eu mach pagura
Ch' i veuje rendne l' aria scura scura
A forsa d' gran nebias;
Ma j' eu peui ancor pi por
Ch' i dvento del color
D' sofram, e breu d' lasagne
Pr cousti veust perfum,
Signore Magne.

Andè ant le stale,
Tireve la camisa su le spale

Ch' i sie an libertà ;
 E senza sugession
 Podi tirè 'l canon
 Tra voi aitre compagne
 Con tut 'l gust del mond,
 Signore Magne.

Ma pieve guarda
 Ch' d' vote v' scapeissa la mostarda
 Tut giù pr i causat ;
 Prchè s' i veustri arsort
 A son nen bon e fort,
 Ch' a l' abio dle mangagne,
 Le frange v' scapran,
 Signore Magne.

E s' la cisrera
 A vneisa a spataresse un pò pr tera .
 La bsest che rabadan !
 L'è vèi ch' a peul giuté
 A cresse l' liamè ;
 Ma peui pr le campagne
 Miraco s' a l' è bon,
 Signore Magne.

A m' ven an testa
 D' mandeve dont a fan quaich grossa festa
 A desparè i mortrat,
 Prli i podrie ancor
 Pro feve gran onor,
 Pr fè sauté d' safagne
 A tuti i bombardè,
 Signore Magne.

E s' un sol viaggi
 La gent a v' sentiran, fè pur couragi,
 Vedrie lo ch' a sarà,
 Ch' a fassa bel o brut,
 Sari ciamà pr tut,
 E li veui ch' i guadagne

A galossà i quattrin,
Signore Magne.

Ma s' i voleisse

Fè coust mestè, ventria peui ch' i andeisse
Sovens a l' arsenal
Pr feve butè un gran
Ai vostri patapan,
Prchè da ste cocagne
I restrè sfogonà,
Signore Magne.

E così pieve

Ampò sta bela arseta ch' i veui deve,
Piantève un bon stopon,
Stopeve bin l' ussat,
Ai manca pa d' cornat,
Ventrà però ch' ij bagne
D' senevra e d' acqua fort,
Signore Magne.

Espressioni amorose di Bartolomeo
verso Caterina.

CANZONE VIII.

Catlinna mi t' lo giur,
E tenlo pr sigur,
Ch' i t' m' as robame 'l cheur;
I son tant carpionà,
E marca dla vrità,
Buca com' i desvenno,
Ch' i n' eu pi nen che 'l fià.
Coul viagi ch' i t' trover
Astà là su coul cher,
E ch' i t' eu date d' l' eui,
I son sta pià talment,